

四庫全書

史部

欽定四庫全書

史部

史記卷三十一

詳校官侍讀學士臣陸伯燧

洗馬臣王坦修覆勘

覆校官中書臣陳林

校對官中書臣孫希旦

謄錄監生臣黃嘉績

欽定四庫全書

史記卷三十一

漢 太 史 令司馬遷 撰

宋中郎外兵曹參軍裴駙集解

唐國子博士弘文館學士司馬貞索隱

唐諸王侍讀率府長史張守節正義

吳太伯世家第一

索隱系家者記諸侯本系也言其下及子孫常有國故孟子曰陳仲子齊之系家又董仲舒曰

王者封諸侯非官之也  
得以代代爲家者也

吳太伯

集解韋昭曰後武王追封爲吳伯故曰吳太伯  
索隱國語黃池之會晉定公使謂吳王夫差曰

夫命圭有命固曰吳伯不曰吳王是吳本伯爵也范甯  
解論語曰太者善大之稱伯者長也周太王之元子故  
曰太伯稱仲雍季歷皆以字配名則伯亦是字又是爵  
但其名史籍先闕爾正義吳國號也太伯居梅里在常  
州無錫縣東南六十里至十九世孫壽夢居之號句吳  
壽夢卒諸樊南徙吳至二十一代孫光使子胥築闔閭  
城都之今  
蘓州也  
太伯弟仲雍  
索隱伯仲季是兄弟次第之字  
若表德之字意義與名相符則  
系本曰吳孰哉居藩籬宋忠曰孰哉仲雍字藩籬今  
吳之餘暨也解者云雍是孰食故曰雍字孰哉也  
皆

周太王之子而王季歷之兄也季歷賢而有聖子昌太

王欲立季歷以及昌於是太伯仲雍二人乃奔荊蠻文

身斷髮示不可用

集解應劭曰常在水中故斷其髮文其身以象龍子故不見傷害正義江

熙云太伯少弟季歷生文王昌有聖德太伯知其必有天下故欲傳國於季歷以太王病託採藥於吳越不反太王薨而季歷立一讓也季歷薨而文王立二讓也文王薨而武王立遂有天下三讓也又釋云太王病託採藥生不事之以禮一讓也太王薨而不反使季歷主喪不葬之以禮二讓也斷髮文身示不可用使季歷主祭祀不祭之以禮三讓也以避季歷季歷果立是爲王季而昌爲文

王太伯之奔荊蠻自號句吳

集解宋忠曰句吳太伯始所居地名索隱荊者楚之

舊號以州言之曰荊蠻者閩也南夷之名蠻亦稱越此言自號句吳吳名起於太伯明以前未有吳號地在楚

越之界故稱荆蠻顏師古註漢書以吳言句者夷之發聲猶言於越耳此言號句吳當如顏解而註引宋忠以爲地名者系本居篇云孰哉居藩籬孰姑徙句吳宋氏見史記有太伯自號句吳之文遂彌縫解彼云是太伯始所居地名裴氏引之恐非其義藩籬既有其地句吳何總不知真實吳人不聞別有城邑謂名句吳則系本難依信

卒

集解皇覽曰太伯冢在吳縣北梅里聚去城十里

無子弟仲雍立是爲吳仲

雍仲雍卒

索隱吳地記曰仲雍冢在吳鄉常孰縣西海虞山上與言偃冢並列

子季簡立

季簡卒子叔達立叔達卒子周章立是時周武王克殷

求太伯仲雍之後得周章周章已君吳因而封之乃封

周章弟虞仲於周之北故夏虛

集解徐廣曰在河東大陽縣

是爲虞

仲

索隱夏都安邑虞仲都大陽之虞城在安邑南故曰夏虛左傳曰太伯虞仲太王之昭則虞仲是太王之

子必也又論語稱虞仲夷逸隱居放言是仲雍稱虞仲今周章之弟亦稱虞仲者蓋周章之弟字仲始封於虞故曰虞仲則仲雍本字仲而爲吳之始祖故後代亦稱虞仲所以祖與孫同號也

列爲諸侯周

章卒子熊遂立熊遂卒子柯相立

正義柯音歌相音反

柯相卒

子彊鳩夷立彊鳩夷卒子餘橋疑吾立

正義橋音躊驕反

餘橋

疑吾卒子柯盧立柯盧卒子周繇立

正義繇音遙又如字

周繇卒

子屈羽立

正義屈音居勿反

屈羽卒子夷吾立夷吾卒子禽處

立禽處卒子轉立

索隱譙周古史考云柯轉

轉卒子頗高立

索隱古史考作

頗高卒子句卑立

索隱古史考云畢軫

是時晉獻公滅周北虞

公以開晉伐虢也

索隱春秋經僖公五年冬晉人執虞公左氏二年傳曰晉荀息請以屈產

之乘與垂棘之璧假道於虞以伐虢虞公許之且請先伐虢宮之奇諫不聽晉里克荀息帥師會虞師伐虢滅下陽五年傳曰晉侯復假道伐虢宮之奇以其族行曰虞不臘矣八月甲午晉侯圍上陽冬十有二月滅虢師還遂襲句卑卒子去齊立去齊卒子壽夢立

正義夢莫公反壽

夢立而吳始益大稱王自太伯作吳五世而武王克殷封其後爲二其一虞在中國其一吳在夷蠻十二世而



晉滅中國之虞中國之虞滅二世而夷蠻之吳興

正義中國

之虞滅後二世合七十一

大凡從太伯至壽夢十九世

年至壽夢而興大稱王

索隱壽夢是仲

王壽夢二年索隱自壽夢以下始有其年春秋唯記卒計壽夢二

雍十八代孫

年當成楚之亡大夫申公巫臣怨楚將子反而犇晉自

公七年晉使吳教吳用兵乘車令其子爲吳行人

集解服虔曰行人掌國賓

客之禮籍以待四方之使賓大客受小客之幣辭索隱左氏成二年曰巫臣聘齊及鄭使介反幣而以夏姬行遂奔晉七年傳曰子重子反殺巫臣之族而分其室巫臣遺二子書曰余必使爾罷於奔命以死巫臣使於吳吳子壽夢悅之乃通吳于晉教吳乘車教之戰陣教之叛楚寘其子狐庸焉使爲行人吳始伐楚伐巢伐徐馬

陵之會吳入州來子重子  
反於是乎一歲七奔命

吳於是始通於中國吳伐楚

十六年楚共王伐吳至衡山

集解杜預曰吳興烏程縣南也索隱春秋經襄三年

楚公子嬰齊帥師伐吳左傳曰楚子重伐吳爲簡之師克鳩茲至于衡山也

二十五年王壽

夢卒

索隱襄十二年經曰秋九月吳子乘卒左傳曰壽夢計從成六年至此正二十五年系本曰吳孰姑

徙句吳宋忠曰孰姑壽夢也代謂祝夢乘諸也壽孰音相近姑之言諸也毛詩傳讀姑爲諸孰姑壽夢是一人

又名乘也壽夢有子四人長曰諸樊

索隱春秋經書吳子過左傳稱諸樊蓋過是其

名諸樊是其號次曰餘祭次曰餘昧

索隱左氏曰閭戕戴吳杜預曰戴吳

公羊傳過作謁餘祭也又襄二十八年左氏齊慶封奔吳吳句餘與之  
朱方杜預曰句餘吳子夷末也按餘祭以襄二十九年

卒則二十八年賜慶封邑不得是夷末但句餘或別是一人杜預誤以爲夷末爾惟史記公羊作餘昧左氏及穀梁並爲夷末夷末句餘音字各異不得爲一正義祭側界反昧莫葛反次曰季札索隱公謂也餘祭也夷昧也與季子同母者四人季子弱而才兄弟皆愛之同欲以爲君季子猶不受謁請兄弟迭爲君而致國乎季子皆曰諾故謁也死餘祭也立餘祭也死夷昧也立夷昧也死則國宜之季子季子使而亡焉僚者長庶也即之闔閭曰將從先君之命與則國宜之季子也如不從先君之命則宜立者我也僚惡得爲君乎於是使專諸刺僚史記壽夢四子亦約公羊文但以僚爲餘昧子爲異耳左氏其文不明服虔用公羊杜預依史記及吳越春秋下註徐廣引系本云夷昧生光引吳越春秋云王僚夷昧子今檢系本吳越春秋並無此語然按左氏狐庸對趙文子謂夷末甚德而度其天所啓也必此君之子孫實終之若以僚爲夷末子不應此言

又光言我王嗣則光是夷昧子明僚是壽夢庶子

季札賢而壽夢欲立之季札

讓不可於是乃立長子諸樊攝行事當國王諸樊元年

集解駟案系本曰諸樊徙吳也索隱按在左氏襄十四年諸樊已除喪讓位季札季

札謝曰曹宣公之卒也諸侯與曹人不義曹君

集解服虔曰宣

公曹伯廬也以魯成公十三年會晉侯伐秦卒於師曹君公子負芻也負芻在國間宣公卒殺太子而自立故

曰不義之也

將立子臧子臧去之以成曹君

集解服虔曰子臧負芻庶兄索

隱成十三年左傳曰曹宣公卒于師曹人使公子負芻守使公子欣時逆喪秋負芻殺其太子而自立杜預曰皆宣公庶子也負芻成公也欣時子臧也十五年傳曰會于戚討曹成公也執而歸諸京師諸侯將見子臧於

王而立之子臧曰前志有之曰聖達節杜預曰聖人應天命不拘常體也次守節杜預曰謂賢者下失節杜預

曰愚者妄動也爲君非吾節也雖不能聖敢失守乎遂逃奔宋君子曰能守節矣君義

嗣

集解王肅曰義宜也嫡子嗣國得禮之宜杜預曰諸樊嫡子故曰義嗣索隱君子者左丘明所爲史評仲

尼之辭指仲尼爲君子也誰敢干君有國非吾節也札雖不才願附

於子臧之義吳人固立季札季札棄其室而耕乃舍之

正義舍音捨

秋吳伐楚楚敗我師四年晉平公初立

索隱左

六年春葬晉悼公平公即位是也

十三年王諸樊卒

索隱春秋經襄十五年十有二月

吳子遏伐楚門于巢巢卒左氏曰吳子諸樊伐楚以報舟師之役門于巢巢牛臣曰吳王勇而輕若啓之將親門

我獲射之必殪是君也死疆其少安從有命授弟餘祭之吳子門焉牛臣隱於短牆以射之卒

欲傳以次必致國於季札而止以稱先王壽夢之意且

嘉季札之義兄弟皆欲致國令以漸至焉季札封於延

陵故號曰延陵季子

索隱襄三十一年左傳趙文子問於屈狐庸曰延州來季子其果立

乎杜預曰延州來季札邑昭二十七年左傳曰吳子使延州來季子聘於上國杜預曰季子本封延陵後復封州來故曰延州來成七年左傳曰吳入州來杜預曰州來楚邑淮南下蔡縣是昭十三年傳吳伐州來二十三年傳吳滅州來則州來本爲楚邑吳伐滅以封季子也地理志云會稽毗陵縣季札所居太康地理志曰故延陵邑季札所居栗頭有季札祠地理志云沛郡下蔡縣古州來國爲楚所滅後吳取之至夫差遷昭侯於州來

公羊傳曰季子去之延陵終身不入吳國何休曰不入吳朝廷也此云封於延陵謂國而賜之以采邑杜預春秋釋例土地名則云延州來闕不知何故而爲是言

王餘祭三年齊相慶封有罪

自齊來奔吳吳子慶封朱方之縣

集解駰案吳地記曰朱方秦改曰丹徒

以爲奉邑以女妻之富於在齊四年吳使季札聘於魯

集解駰案在春秋魯襄公二十九年請觀周樂

集解服虔曰周樂魯所受四代之樂也杜預曰魯以

周公故有天子禮樂

爲歌周南召南

集解杜預曰此皆各依其本國歌所常用聲曲

曰美

哉始基之矣

集解王肅曰言始造王基也

猶未也

集解賈逵曰言未

杜預曰猶有商紂未盡善也

然勤而不怨

集解杜預曰未能安樂然其音不怨怒

歌邶

鄘衛

集解杜預曰武王伐紂分其地爲三監三監叛周公滅之并三監之地更封康叔故三國盡被康叔

之曰美哉淵乎憂而不困者也

集解賈逵曰淵深也杜預曰亡國之音哀以思

其民困衛康叔武公德化深遠雖遭宣公淫亂懿公滅亡民猶秉義不至於困

吾聞衛康叔武

公之德如是是其衛風乎

集解賈逵曰康叔遭管叔蔡叔之難武公罹幽王褒姒之

變故曰康叔武公之德如是杜預曰康叔武公皆衛之令德君也聽聲以爲別故有疑言

歌王

集解服虔

曰王室當在雅哀微而列在風故國人猶尊之故稱王猶春秋之王人也杜預曰王黍離也

曰美哉

思而不懼其周之東乎

集解服虔曰平王東遷雒邑杜預曰宗周殞滅故憂思猶有先

王之遺風故不懼也正義思音肆

歌鄭

集解賈逵曰鄭風東鄭是

曰其細已甚民不



堪也是其先亡乎

集解服虔曰其風細弱已甚攝於大國之間無遠慮持久之風故曰民不

堪將先亡也

歌齊曰美哉泱泱乎大風也哉

集解服虔曰泱泱舒緩深遠有

太和之意其詩風刺辭約而義微體疎而不切故曰大風索隱決於良反決決猶汪洋汪洋美盛貌也杜預曰

引大之聲

表東海者其太公乎

集解王肅曰言為東海之表式

國未可量也

集解服虔曰國之興衰世數長短未可量也杜預曰言其或將復興

歌豳曰美哉蕩蕩乎

樂而不淫

集解賈逵曰蕩然無憂自樂而不荒淫也

其周公之東乎

集解杜預曰周

公遭管蔡之變東征為成王陳后稷先公不敢荒淫以成王業故言其周公東乎

歌秦曰此之

謂夏聲夫能夏則大大之至也其周之舊乎

集解杜預曰秦仲始

有車馬禮樂去戎狄之音而有諸夏之聲故謂之夏聲及襄公佐周平王東遷而受其故地故曰周之舊也

歌魏曰美哉泂泂乎大而婉儉而易行以德輔此則盟

主也

集解徐廣曰盟一作明駟案賈逵曰其志大直而有曲體歸中和中庸之德難成而實易行故曰以

德輔此則盟主也杜預曰惜其國小而無明君索隱泂音馮又音泛杜預曰中庸之聲婉約也大而約則儉節易行左傳盟作明故徐廣亦云一作明此以聽聲知政言其明聽爾非盟會也歌唐曰思深哉

其有陶唐氏之遺風乎不然何憂之遠也

集解杜預曰晉本唐國故

有堯之遺風憂深思遠情發於聲也非令德之後誰能若是歌陳曰國無

主其能久乎

集解杜預曰淫聲放蕩無所畏忌故曰國無主

自鄆以下無譏焉

集解服虔曰鄩以下及曹風也其國小無所刺譏歌小雅集解杜預曰小雅曰小正亦樂歌之章曰

美哉思而不貳

集解杜預曰思文武之德無貳叛之心也

怨而不言集解王肅曰非

不能言畏罪咎也

其周德之衰乎

集解杜預曰衰小也

猶有先王之遺民

也

集解杜預曰謂有殷王餘俗故未大

歌大雅

集解杜預曰大雅陳文王之德以正天下

曰廣

哉熙熙乎

集解杜預曰熙熙和樂聲

曲而有直體

集解杜預曰論其聲

其文王

之德乎歌頌

集解杜預曰頌者以其成功告于神明

曰至矣哉

集解賈逵曰言道備

至直而不倨

集解杜預曰倨傲也

曲而不詘

集解杜預曰詘撓也

近而不偪

集解杜預曰謙退也

遠而不攜

集解杜預曰攜貳也

遷而不淫

集解服虔曰遷徙也文王

徒鄴武王居鄩杜預曰淫過蕩也

復而不厭

集解杜預曰常日新也

哀而不愁

集解

杜預曰知命也

樂而不荒

集解杜預曰節之以禮也

用而不匱

集解杜預曰德弘大

廣

而不宣

集解杜預曰不自顯也

施而不費

集解杜預曰因民所利而利之

取而不

貪

集解杜預曰義然後取

處而不底

集解杜預曰守之以道

行而不流

集解杜預

曰制之以義

五聲和八風平

集解杜預曰宮商角徵羽謂之五聲八方之氣謂之八風

節

有度守有序

集解杜預曰八音克諧節有度也無相奪倫守有序也

盛德之所同

也

集解杜預曰頌有殷魯故曰盛德之所同

見舞象箛南籥者

集解賈逵曰象文王之樂

武象也箛舞曲也南籥以箛舞也索隱箛音朔又蘇彫反

曰美哉猶有憾

集解服虔曰憾恨也

恨不及已以伐紂而致太平也索隱憾  
或作憾字省爾亦讀為憾又音胡暗反

見舞大武

集解賈逵

曰大武周公所作武王樂也

曰美哉周之盛也其若此乎見舞韶護

者

集解賈逵曰韶護殷成湯樂大護也

曰聖人之弘也

集解賈逵曰弘大也

猶有慙

德聖人之難也

集解服虔曰慙於始伐而無聖佐故曰聖人之難也

見舞大夏

集解

賈逵曰夏禹之樂大夏也

曰美哉勤而不德

集解服虔曰禹勤其身以治水土也

非禹

其誰能及之見舞招箏

集解服虔曰有虞氏之樂大韶也索隱韶簫二字體變耳

曰

德至矣哉大矣

集解服虔曰至帝王之道極於韶也盡美盡善也

如天之無不

燾也

集解賈逵曰燾履也

如地之無不載也雖甚盛德無以加矣

觀止矣若有他樂吾不敢觀

集解服虔曰周用六代之樂堯曰咸池黃帝曰雲門

魯受四代下周二等故不舞其二季札知之故曰有他樂吾不敢請

去魯遂使齊說晏平

仲曰子速納邑與政

集解服虔曰入邑與政職於公不與國家之事

無邑無政

乃免於難齊國之政將有所歸未得所歸難未息也故

晏子因陳桓子以納政與邑是以免於樂高之難

正義難乃

憚反在魯昭公八年樂施高彊二氏作難陳桓子和之乃解也

去齊使於鄭見子產如

舊文謂子產曰鄭之執政侈難將至矣政必及子子爲

政慎以禮

集解服虔曰禮所以經國家利社稷也

不然鄭國將敗去鄭適

衛說遽瑗史狗史鰭公子荊公叔發公子朝曰衛多君

子未有患也自衛如晉將舍於宿

集解駟案左傳曰將宿於戚索隱按太史

公欲自為一家事雖出於左氏文則隨義而換既以舍字替宿遂以宿字替戚爾戚既是邑名理應不易今宜

讀宿為戚戚衛邑孫文子舊所食也

聞鐘聲

集解服虔曰孫文子鼓鍾作樂也

曰異哉吾

聞之辯而不德必加於戮

集解服虔曰辯若鬪辯也夫以辯爭不以德居之必加于

刑戮也

夫子獲罪於君以在此

集解賈逵曰夫子孫文子也獲罪出獻公以戚畔也

懼猶不足而又可以畔乎

索隱按春秋左氏傳曰而又何樂此畔字宜讀曰樂樂謂

聞鐘聲也畔非其義耳

夫子之在此猶燕之巢於幕也

集解王肅曰言至危

也君在殯而可以樂乎

集解賈逵曰言衛君獻公棺在殯未葬

遂去之文

子聞之終身不聽琴瑟

集解服虔曰聞義而改也琴瑟不聽況于鍾鼓乎

適晉

說趙文子

索隱名武

韓宣子

索隱名起正義世本云名秦

魏獻子

索隱名舒

曰

晉國其萃於三家乎

集解服虔曰言晉國之祚將集於三家

將去謂叔向

曰吾子勉之君侈而多良大夫皆富政將在三家

集解杜預

曰富必厚施故政在三家也

吾子直

集解服虔曰直不能曲撓以從衆

必思自免於

難季札之初使北過徐君徐君好季札劍口弗敢言季

札心知之爲使上國未獻還至徐徐君已死於是乃解



其實劒繫之徐君冢樹而去

正義括地志云徐君廟在泗州徐城縣西南一里卽

延陵季子掛劒之徐君也

從者曰徐君已死尚誰予乎季子曰不然

始吾心已許之豈以死倍吾心哉七年楚公子圍弑其

王夾敖而代立是爲靈王

索隱春秋經襄二十五年吳子遏卒二十九年閻殺吳子

餘祭昭十五年吳子夷末卒是餘祭立四年餘昧在位十七年系家倒錯二王之年此七年正是餘昧之三年昭元年經曰冬十有一月楚子麇卒左傳曰楚公子圍將聘于鄭未出境聞王有疾而還入問王疾縊而弑之孫卿曰以冠纓絞之遂殺其二子幕及平夏葬王於郟謂之郟敖

十年楚靈王會諸侯

而以伐吳之朱方以誅齊慶封吳亦攻楚取三邑而去

集解駟案左傳曰吳伐楚入棘櫟麻以報朱方之役索隱杜預註彼云皆楚東鄙邑也譙周云鄧縣東北有棘亭汝陰新蔡縣東北有櫟亭按解者以麻即襄城縣故麻城是也

十一年楚伐吳至雩

婁

集解服虔曰雩婁楚之東邑索隱昭五年左傳曰楚子伐吳使沉尹射待命於巢遂啟疆待命雩婁今直

言至雩婁略耳

十二年楚復來伐次於乾谿

集解杜預曰乾谿在譙國城父縣南

楚東境

楚師敗走十七年王餘祭卒

索隱春秋襄二十九年經曰閻殺吳子餘

祭左傳曰吳人伐越獲俘焉以爲閻使守舟吳子餘祭觀舟閻以刃殺之公羊傳曰近刑人則輕死之道也合在季札聘魯之前倒錯於此

弟餘昧立王餘昧二年楚公子弃疾弑

其君靈王代立焉

索隱據春秋即餘昧十五年也昭十三年經曰夏四月楚公子比自晉歸

于楚弑其君虔於乾谿楚公子弃疾殺公子比左氏具載詞繁不錄公子比弃疾皆靈王弟也比即子干也靈王公子圍也即位後易名爲虔弃疾即位後易名熊居是爲平王史記以平王遂有楚國故曰弃疾弑君春秋以子干爲王故曰比弑其君彼此各有意義也

四年王餘昧卒欲授弟季札季

札讓逃去於是吳人曰先王有命兄卒弟代立必致季

子季子今逃位則王餘昧後立今卒其子當代乃立王

餘昧之子僚爲王

索隱此文以爲餘昧子公羊傳以爲壽夢庶子

王僚二年公

子光伐楚

集解徐廣曰世本云夷昧生光吳越春秋曰王僚夷昧子與史記同

敗而亡王

舟光懼襲楚復得王舟而還

集解駢案左傳曰舟名餘皇索隱計僚元年當昭十

六年比二年公子光亡王  
舟事在左氏昭十七年

五年楚之亡臣伍子胥來奔

公子光客之

索隱左傳昭二十年曰伍員如吳言伐楚之利於州于杜預曰州于吳子僚也公子

光曰是宗爲戮而欲反其讎不可從也員曰彼將有他志余姑爲之求士而鄙以待之乃見鱗設諸焉而耕於

鄙是謂以客禮接之

公子光者王諸樊之子也

索隱此文以爲諸樊子系本以爲夷

昧子也

常以爲吾父兄弟四人當傳至季子季子即不受

國光父先立即不傳季子光當立陰納賢士欲以襲王

僚八年吳使公子光伐楚敗楚師迎楚故太子建母於

居巢以歸因北伐敗陳蔡之師九年公子光伐楚拔居

巢鍾離

集解服虔曰鍾離州來西邑也索隱昭二十四年經曰冬吳滅巢左氏曰楚子爲舟師以略吳

疆沈尹戌曰此行也楚必亡邑不撫民而勞之吳不動而速之吳人踵楚邊人不備遂滅巢及鍾離而還地理志居巢屬廬江鍾離屬九

江應劭曰鍾離子之國也

初楚邊邑卑梁氏之處女與

吳邊邑之女爭桑

索隱左氏無其事

二女家怒相滅兩國邊邑

長聞之怒而相攻滅吳之邊邑吳王怒故遂伐楚取兩

都而去

正義兩都即鍾離居巢

伍子胥之初犇吳說吳王僚以伐

楚之利公子光曰胥之父兄爲僇於楚欲自報其仇耳

未見其利於是伍員知光有他志

集解服虔曰欲取國

乃求勇士

專諸

集解賈逵曰吳勇士索隱專或作刺左傳作轉設諸刺客傳曰諸堂邑人也正義吳越春秋專諸豐

邑人伍子胥初亡楚如吳時遇之於途專諸方與人鬪甚不可當其妻呼還子胥怪而問其狀專諸曰夫屈一人之下必申萬人之上胥因而相見之光光喜乃客伍之雄貌深目侈口熊背知其勇士

子胥子胥退而耕於野以待專諸之事

索隱依左傳即上五年公子光

客之是也事合記於五年不應略彼而更具於此也

十二年冬楚平王卒

索隱昭二十六年

年春秋經書楚子居卒是也按十二年春侯年表及左傳合在僚十二年

十三年春吳欲因

楚喪而伐之

索隱據表及左氏僚止合有十使公子蓋二年事並見昭二十七年左傳

餘燭庸

集解賈逵曰二公子皆吳王僚之弟索隱春秋作掩餘而史記並作蓋餘音同而字異者或謂

太史公被腐刑不欲言掩也賈逵及杜預並刺客傳皆云二公子王僚母弟而昭二十三年左傳曰光帥右掩餘帥左杜註云掩餘吳王壽夢子又系族譜亦云二公子並壽夢子若依公羊僚為壽夢子則與系族譜合也以兵圍楚之六濞

集解杜預曰濞在廬江六縣西南

使季札於晉以觀

諸侯之變

集解服虔曰察彊弱

楚發兵絕吳兵後吳兵不得還於

是吳公子光曰此時不可失也

集解賈逵曰時言可殺王時也

告專諸

曰不索何獲

集解服虔曰不索當何時得也

我真王嗣當立吾欲求之

季子雖至不吾廢也

集解王肅曰聘晉還至也

專諸曰王僚可殺也

母老子弱

集解服虔曰母老子弱專諸託其母子於光也王肅曰專諸言王母老子弱也索隱依王

肅解與史記同於理無失服虔杜預見左傳下文云我爾身也以其子爲卿遂強解是無若我何猶言我無若是何語不近情而兩公子將兵攻楚楚絕其路方今吳過爲迂回非也

外困於楚而內空無骨鯁之臣是無奈我何光曰我身

子之身也

集解服虔曰言我身猶爾身也

四月丙子光伏甲士於窟室

集解杜預曰掘地爲室也索隱春秋經唯言夏四月左氏亦云丙子當別有按據不知出何書而謁王

僚飲

索隱謁請也本或作請左氏作饗王

王僚使兵陳於道自王宮至光

之家門階戶席皆王僚之親也人夾持鉞

集解音披索隱劉逵註吳

都賦鉞兩刀小刀

公子光詳爲足疾入於窟室

集解杜預曰恐難作王黨殺已



素避之也索隱詳音陽爲如字左氏曰光僞足疾使專  
詳卽僞也或讀此爲字音僞非也豈佯僞重言耶

諸置匕首於炙魚之中

集解服虔曰全魚炙也索隱劉氏曰匕首短劍也按鹽鐵論以

爲長尺八寸通俗文云其頭類七故曰匕首短刃可袖者以進食手匕首刺王僚鉞

交於匈

集解賈逵曰交專諸匈也

遂弑王僚公子光竟立爲王是爲

吳王闔廬闔廬乃以專諸子爲卿季子至曰苟先君無

廢祀民人無廢主社稷有奉乃吾君也吾敢誰怨乎哀

死事生以待天命

集解服虔曰待其天命之終也

非我生亂立者從之

先人之道也

集解杜預曰吳自諸樊已下兄弟相傳而不立適是亂由先人起也季子自知力不

能討光

復命哭僚墓

集解服虔曰復命於僚哭其墓也正義復音伏下同

復位而

待

集解杜預曰復本位待光命

吳公子燭庸蓋餘二人將兵遇圍於

楚者聞公子光弑王僚自立乃以其兵降楚楚封之於

舒

索隱左氏昭二十七年曰掩餘奔徐燭庸奔鍾吾三十年經曰吳滅徐徐子奔楚左傳曰吳子使徐人執

掩餘使鍾吾人執燭庸二公子奔楚楚子大封而定其徙無封舒之事當是舒徐字亂又且疎畧也王闔

廬元年舉伍子胥爲行人而與謀國事楚誅伯州犂其

孫伯嚭亡奔吳

集解徐廣曰伯嚭州犂孫也史記與吳越春秋同嚭音披美反

吳以爲

大夫三年吳王闔廬與子胥伯嚭將兵伐楚楚拔舒殺吳

亡將二公子光謀欲入郢將軍孫武曰民勞未可待之

索隱左傳此年有子胥對耳無孫武事也

四年伐楚取六與潛五年伐越敗

之六年楚使子常囊瓦伐吳

正義左傳云楚囊瓦爲令尹杜預云囊之孫子常

迎而擊之大敗楚軍於豫章取楚之居巢而還

索隱在左傳定

十年當爲闔廬七年

九年吳王闔廬謂伍子胥孫武曰始子之言

郢未可入今果如何

索隱言今欲果敢伐楚可否也

二子對曰楚將子

常貪而唐蔡皆怨之王必欲大伐必得唐蔡乃可闔廬

從之悉興師與唐蔡西伐楚

索隱定四年經蔡侯以吳子及楚人戰于柏舉楚師

敗績吳入郢是也

至於漢水楚亦發兵拒吳夾水陳

正義音陣

吳王

闔廬弟夫槩

正義音古代反

欲戰闔廬弗許夫槩曰王已屬臣

兵兵以利爲上尚何待焉遂以其部五千人襲冒楚楚

兵大敗走於是吳王遂縱兵追之比至郢五戰楚五敗

楚昭王亡出郢奔鄖

集解服虔曰鄖楚縣

鄖公弟

正義左傳云鄖公辛之弟懷也

欲弒昭王昭王與鄖公犇隨

集解服虔曰隨楚與國也

而吳兵遂入

郢子胥伯嚭鞭平王之尸以報父讎

索隱左氏無此事

十年春

越聞吳王之在郢國空乃伐吳吳使別兵擊越楚告急

秦秦遣兵救楚擊吳吳師敗闔廬弟夫槩見秦越交敗

吳吳王留楚不去夫槩亡歸吳而自立爲吳王闔廬聞

之乃引兵歸攻夫槩夫槩敗奔楚楚昭王乃得以九月

復入郢而封夫槩於堂谿爲堂谿氏

集解司馬彪曰汝南吳房有堂谿亭

正義括地志云豫州吳房縣在州西北九十里應劭云吳王闔廬弟夫槩奔楚封之于堂谿氏本房子國以封

吳故曰吳房

十一年吳王使太子夫差伐楚取番楚恐而去

郢徙都

集解服虔曰郢楚邑索隱定六年左傳四月己丑吳太子終累敗楚舟師杜預曰闔廬子夫差

兄此以爲夫差當謂名異而一人耳左傳又曰獲潘子臣小惟子及大夫七人楚於是乎遷郢於都此言番番

音潘楚邑名子臣即其邑之大夫也

十五年孔子相魯

索隱定十年左傳曰夏公會齊侯于

祝其實夾谷孔丘相犂彌言於齊侯曰孔丘知禮而無勇是也杜預以爲相會議也而史遷孔子系家云攝行相事按左氏孔丘以公退曰士兵之又使茲無還揖對蓋是攝國相也

十九年夏吳伐越

越王句踐迎擊之檣李

集解賈逵曰檣李越地杜預曰吳郡嘉興縣南有檣李城也檣

音越使死士挑戰

集解徐廣曰死一作亶越世家亦然或者以爲人名氏乎駟案賈逵曰死

士死罪人也鄭衆曰死士欲以死報恩者也杜預曰敢死之士也正義挑音田鳥反

三行造吳師

呼自剄

集解駟案左傳曰使罪人三行屬劍於頸

吳師觀之越因伐吳敗之

姑蘇

集解駟案越絕書曰闔廬起姑蘇臺三年聚材五年乃成高見三百里索隱姑蘇臺名在吳縣西三

十傷吳王闔廬指軍却七里吳王病傷而死

索隱左傳云定十四

年越子大敗之靈姑浮以戈擊闔廬闔廬傷將指還卒於陘去檣李七里此云擊之檣里又云敗之姑蘇自爲乖異杜預註檣里在嘉興縣南靈姑浮越大夫也

闔廬使立太子夫差謂曰爾

而忘句踐殺汝父乎對曰不敢三年乃報越

集解駢案越絕書曰

闔廬冢在吳縣昌門外名曰虎邱下池廣六十步水深一丈五尺桐棺三重瀕池六尺玉鳧之流扁諸之劍三千方員之口三千槃郢魚腸之劍在焉卒十餘萬人治之取土臨湖葬之三日白虎居其上故號曰虎邱索隱此以爲闔廬謂夫差夫差對闔廬若左氏傳則云對曰者夫差對所使之人也瀕音胡貢反以水銀爲池

夫差元年

集解駢案越絕書曰太伯到夫差二十六代且千歲索隱按太伯至壽夢十九代諸樊已

下六王雅

以大夫伯嚭爲太宰

索隱左傳定四年伯嚭爲太宰當闔廬九年非

夫差代也

習戰射常以報越爲志二年吳王悉精兵以伐越

敗之夫椒

集解賈逵曰夫椒越地杜預曰太湖中椒山也索隱賈逵云越地蓋近得之然其地關不

知所在杜預以爲太湖中椒山非戰所夫椒與椒山不得爲一且夫差以報越爲志又伐越當至越地何乃不離吳境近在太湖中又報姑蘇也越王句踐乃以甲兵

按越語云敗五湖也

五千人棲於會稽

集解賈逵曰會稽山名索隱鳥所止宿曰棲越爲吳敗依山林故以鳥棲

爲喻左傳作保國語作棲

使大夫種因吳太宰嚭而行成

集解服虔曰行成求

成也索隱大夫官也種名也吳越春秋以爲種姓文而劉氏云姓大夫非也正義國語云越飾美女八人納太



宰嚭曰子苟然放越之罪請委國爲臣妾吳王將許之伍子胥諫曰

昔有過氏殺斟灌以伐斟尋

集解賈逵曰過國名也斟灌斟尋夏同姓也夏后相

依斟灌而國故曰殺夏后相也索隱過音戈寒浞之子澆所封國也猗姓國晉地道記曰東萊掖縣有過鄉北有過城是古之過國者也斟灌斟尋夏同姓賈氏據系本而知也按地理志北海壽光縣應劭云古垺灌禹後今灌亭是也又平壽縣云故垺尋禹後今垺城是也垺與斟同滅夏后帝相  
集解服虔曰夏后相啓之帝相之妃后緡方娠

集解賈逵曰緡有仍之姓也杜預曰娠懷身也逃於

有仍

集解賈逵曰有仍國名后緡之家

而生少康

集解服虔曰少康爲后緡遺腹子

有仍牧正

集解王肅曰牧正牧官之長也

有過又欲殺少康少康奔有

虞

集解賈逵曰有虞帝舜之後杜預曰梁國虞縣

有虞思夏德於是妻之以二

女而邑之於綸

集解賈逵曰綸虞邑

有田一成有衆一旅

集解賈逵曰方

十里爲成五百人爲旅

後遂收夏衆撫其官職

集解服虔曰因此基業稍收取夏遺

民餘衆撫脩夏之故官憲典

使人誘之遂滅有過氏

艾索隱傳云使女艾謀澆季杼誘

殪遂滅過氏杜預曰謀侯也

復禹之績祀夏配天

集解服虔曰以鮌配天也

不失

舊物

集解賈逵曰物職也杜預曰物事也

今吳不如有過之彊而句踐大

於少康今不因此而滅之又將寬之不亦難乎且句踐

爲人能辛苦今不滅後必悔之吳王不聽聽太宰嚭卒

許越平與盟而罷兵去七年吳王夫差聞齊景公死而大臣爭寵新君弱乃興師北伐齊子胥諫曰越王句踐食不重味衣不重采弔死問疾且欲有所用其衆此人不死必爲吳患今越在腹心疾而王不先而務齊不亦

謬乎吳王不聽遂北伐齊敗齊師於艾陵

集解杜預曰艾陵齊地索

隱此之七年魯哀公六年也左氏此年無伐齊事哀十一年有敗齊師於艾陵

至繪集解杜預曰琅邪繒

縣

召魯哀公而徵百牢季康子使子貢以周禮說太宰

嚭乃得止

集解賈逵曰周禮王合諸侯享禮十有二牢上公九牢侯伯七牢子男五牢索隱事在哀

七年當夫差八年不應上連七年按左傳曰子服景伯對不聽乃與之非謂季康子使子貢說得不用百牢太宰嚭自別召康子乃使子貢辭之耳因留略地於齊魯之南九年爲駟伐

魯至與魯盟乃去

索隱左傳駟作邾杜預註左傳亦曰邾今魯國駟縣是也駟邾聲相近自

亂耳駟宜音邾

十年因伐齊而歸十一年復北伐齊越王句踐

率其衆以朝吳厚獻遺之吳王喜唯子胥懼曰是棄吳

也

索隱左氏作蔡吳蔡養也

諫曰越在腹心今得志於齊猶石田無

所用

集解王肅曰石田不可耕

且盤庚之誥有顛越勿遺

集解服虔曰顛隕也

越墜也顛越無道則割絕無遺也索隱左傳曰其顛越不共則剽殄無遺育無俾易種於茲邑是商所以興也

今君易之此即  
史陵戰時也

商之以興

集解徐廣曰一本作盤庚之誥有顛之越之商之以興子

胥傳誥曰有顛越商之興

吳王不聽使子胥於齊子胥屬其子於齊

鮑氏

集解服虔曰鮑氏齊大夫索隱左傳直云使於齊杜預云私使人至齊國屬其子按左氏又云反役

王聞之明非子胥自使也

還報吳王吳王聞之大怒賜子胥屬鏹之

劍以死

集解服虔曰屬鏹劍名賜使自刎索隱劍名見越絕書正義屬音燭鏹音力于反

將死

曰樹吾墓上以梓令可爲器

索隱傳云樹吾墓檟檟可材也吳其亡乎梓檟相類

因變文耳

扶吾眼置之吳東門以觀越之滅吳也

索隱扶烏穴反此國

語文彼以扶爲辟又云以手扶之集解王愠曰孤不使大夫得有見乃盛以鴟夷投之江也正義吳俗傳云子

胥亡後越從松江北開渠至橫山東北築城伐吳子胥乃與越軍夢令從東南入破吳越王即移向三江口岸立壇殺白馬祭子胥杯動酒盡越乃開渠子胥作濤盪羅城東開入滅吳至今猶號曰示浦門曰鱖鮓是從東門入滅

齊鮑氏弑齊悼公吳王聞之哭於軍門外三日

集解服虔曰諸侯相臨之禮索隱公名陽生左傳哀十年曰吳伐齊南鄙齊人殺悼公不言鮑氏又鮑叔以哀八年爲悼公所殺今言鮑氏蓋其宗黨爾且此伐乃從在父陵戰之前年今記於後亦爲顛倒錯亂也

海上

集解徐廣曰上作中

攻齊齊人敗吳吳王乃引兵歸十三年

吳召魯衛之君會於橐臯

集解服虔曰橐臯地名也杜預曰在淮南逡道縣東南索

隱哀公十二年左傳曰公會吳於橐臯衛侯會吳於鄆此并言會衛橐臯者按左傳吳徵會於衛初衛殺吳行

人懼謀於子羽子羽曰不如止也子木曰往也衛侯本不欲赴會故魯以夏會衛及秋乃會之耳所以太史公言其召魯衛會於橐臯也鄭發陽也廣陵海陵縣東南有發繇口橐臯縣名在壽春橐音吐各反臯音姑遼音七巡反道十四年春吳王北會諸侯於黃池集解杜預音才猷反曰陳留封邱縣南有黃亭近濟水

伐吳乙酉越五千人與吳戰丙戌虜吳太子友丁亥入

吳吳人告敗於王夫差夫差惡其聞也集解賈逵曰惡其聞諸侯或

泄其語吳王怒斬七人於幕下集解服虔曰以絕口七月辛丑吳

王與晉定公爭長吳王曰於周室我爲長集解杜預曰吳爲太伯後

故爲長晉定公曰於姬姓我爲伯集解杜預曰爲侯伯趙鞅怒將伐

吳乃長晉定公

集解徐廣曰黃池之盟吳先歃晉次之與外傳同駟案賈逵曰外傳曰吳先歃

晉亞之先叙晉晉有信又所以外吳索隱此依左傳文按左傳趙鞅呼司馬寅曰日肝矣大事未成二臣之罪也建鼓整列二臣死之長幼必可知也是趙鞅怒司馬寅對曰請姑視之反曰肉食者無墨今吳王有墨國其勝乎杜預曰墨氣色下也國爲敵所勝也又曰太子死乎且夷德輕不忍久請少待之乃先晉人是也徐賈所云據國語不與左傳合非也左氏魯襄之代晉楚爲會先書晉晉有信耳外傳即國語也書有二名也外吳者吳夷賤之不許同中國故言外吳王已盟與晉別欲伐宋太宰嚭曰可勝而不能居也乃引兵歸國國亡太子內空王居外久



士皆罷敝於是乃使厚幣以與越平十五年齊田常殺

簡公十八年越益彊越王句踐率兵使伐敗吳師於笠

澤楚滅陳二十年越王句踐復伐吳

索隱哀十九年左氏曰越人侵楚以

誤吳也杜預曰誤吳使不爲備也無伐吳事也

二十一年遂圍吳二十三年十

一月丁卯越敗吳越王句踐欲遷吳王夫差於甬東

集解

賈逵曰甬東越東鄙甬江東也韋昭曰勾章東海口外州也索隱國語曰甬勾東越地會稽勾章縣東海中州

也按今鄞縣即是其處

予百家居之吳王曰孤老矣不能事君王

也吾悔不用子胥之言自令陷此遂自剄死

集解駢案越絕書曰

夫差冢在猶亭西卑猶位越王使干戈人一堞土以葬之近太湖去縣五十七里索隱左傳云乃縊越人以歸猶亭亭名卑猶位三字共爲地名吳地記曰徐枕山一名卑猶位是也堞音路禾反小竹籠以盛土也越王滅吳誅太宰嚭以爲不忠而歸

太史公曰孔子言太伯可謂至德矣三以天下讓民無

得而稱焉

集解王肅曰太伯弟季歷賢又生聖子昌昌必有天下故太伯以天下三讓於王季其讓

隱故無得而稱言之者所以爲至德也

余讀春秋古文乃知中國之虞與

荆蠻句吳兄弟也延陵季子之仁心慕義無窮見微而

知清濁嗚呼又何其閱覽博物君子也

集解駰案皇覽曰延陵季子冢

在毘陵縣暨陽鄉  
至今吏民皆祀事

索隱述贊曰太伯作吳高讓雄圖周章受國別封於  
虞壽夢初霸始用兵車三子遞立延陵不居光既篡  
位是稱闔閭王僚見殺賊由專諸夫差  
輕越取敗姑蘇甬東之耻空慙伍胥

史記卷三十一

史記卷三十一考證

吳太伯世家吳太伯正義至二十一代孫光使子胥築閶閭城都之○子胥監本訛作子齊今改正

太伯弟仲雍索隱孰哉仲雍字藩籬今吳之餘暨也○藩籬監本訛作孰籬今改正

文身斷髮示不可用○困學紀聞曰傳言太伯端委仲雍斷髮史記云二人皆文身斷髮示不可用與傳異將立子臧索隱愚者妄動也○愚監本訛作懸今改正

君子曰能守節矣索隱君子者左邱明所謂史評仲尼之詞指仲尼爲君子也○臣照按季札聘魯孔子八

歲讓國時孔子未生也其引子臧之事何遽得孔子論斷之語而稱之左氏於孔子論斷類皆明著其說其稱君子曰者是記當時之君子有此語耳或以爲邱明自謂或以君子爲孔子皆未達左氏之義也

又正義嫡子嗣國得禮之宜○禮監本訛作體今改

正

猶有先王之遺民也集解杜預曰謂有殷王餘俗故未  
大○徐孚遠曰杜注非也蓋言文武之遺民周衰尚  
在鎬京無緣有殷王餘俗

十七年王餘祭卒○

臣人龍

按左傳及十二諸侯年表

餘祭於四年爲閹所殺此作十七年是與傳表互異  
然年表既言閹殺餘祭而仍書十七年又似餘祭死  
于是年爲真

弟餘昧立○春秋作夷末公羊傳作夷昧

初楚邊邑卑梁氏之處女與吳邊邑之女爭桑○臣照

按楚世家吳之邊邑卑梁與楚邊邑鍾離小童爭桑  
滅卑梁人卑梁大夫怒發邑兵攻鍾離楚王聞之怒  
發國兵滅卑梁吳王聞之亦大怒發兵滅鍾離居巢  
則卑梁爲吳邊邑鍾離爲楚邊邑明矣此云楚邊邑  
卑梁氏云云則又似卑梁爲楚之邊邑也

胥之父兄爲僇于楚欲自報其仇耳○之一本作以  
人持夾鉞索隱曰兩刃小刀○監本訛作兩刃小刃今



改正

有虞思夏德於是妻之以二女而邑之於綸○臣照按

左傳思是虞君名此直作思念之思

十三年吳召魯衛之君會於橐臯○臣世駿按左傳橐

臯之會但有魯君年表並同秋微會於衛乃會于鄆  
耳此并兩事為一

史記卷三十一考證

欽定四庫全書

史記卷三十二

漢

太史

令司馬遷撰

宋中郎外兵曹參軍裴駰集解

唐國子博士弘文館學士司馬貞索隱

唐諸王侍讀率府長史張守節正義

齊太公世家第二

正義括地志云天齊池在青州臨淄縣東南十五里封禪書云齊之所以為齊者以天齊

次公望呂尚者東海上人

集解駟案呂氏春秋曰東夷之士索隱譙周曰姓姜名牙

炎帝之裔伯夷之後掌四岳有功封之於呂子孫從其封姓呂尚其後也按後文王得之渭濱云吾先君太公望子久矣故號太公望蓋牙是字尚是其名後武王號為師尚父則尚父官名其先祖嘗為四

嶽佐禹平水土甚有功虞夏之際封於呂

集解徐廣曰呂在南陽宛

縣西或封於申姓姜氏

索隱地理志申在南陽宛縣申伯之國呂亦在宛縣之西也

夏

商之時申呂或封枝庶子孫或為庶人尚其後苗裔也

本姓姜氏從其封姓故曰呂尚呂尚蓋嘗窮困年老矣

索隱譙周曰呂望常屠牛於朝歌賣飯於孟津

以魚釣奸周西伯

正義奸音干括地志云茲

泉水源出岐州岐山縣西南凡谷呂氏春秋云太公釣  
於茲泉遇文王酈元云磻磻中有泉謂之茲泉泉水潭  
積自成淵渚即太公釣處今人謂之凡谷石壁深高幽  
邃密林澤秀阻人跡罕及東南隅有石室蓋太公所  
居也水次有磻石可釣處即太公垂釣之所其投竿跪  
餌兩膝遺跡猶存是有磻磻之稱也其水清泠神異北  
流十二里注于渭說苑云呂望年七十釣于渭渚三日  
三夜魚無食者望即忿脫其衣冠上有農人者古之異  
人謂望曰子姑復釣必細其綸芳其餌徐徐而投無令  
魚駭望如其言初下得鮒次得鯉刺魚腹得書書文曰  
呂望封于齊

西伯將出獵卜之曰所獲非龍非鸞

集解徐廣

曰勅知反索隱  
餘本亦作螭字

非虎非羆所獲霸王之輔於是周西伯

獵果遇太公於渭之陽與語大說曰自吾先君太公曰

當有聖人適周周以興子真是邪吾太公望子久矣故號之曰太公望載與俱歸立為師或曰太公博聞當事紂紂無道去之游說諸侯無所遇而卒西歸周西伯或曰呂尚處士隱海濱周西伯拘羑里散宜生閔天素知而招呂尚呂尚亦曰吾聞西伯賢又善養老盍往焉三人者為西伯求美女奇物獻之於紂以贖西伯西伯得以出反國言呂尚所以事周雖異然要之為文武師周西伯昌之脫羑里歸與呂尚陰謀修德以傾商政其事

多兵權與奇計

正義六韜云武王問太公曰律之音聲可以知三軍之消息乎太公曰深哉王

之問也夫律管十二其要有五宮商角徵羽此其正聲也萬代不易五行之神道之常也可以知敵金木水火土各以其勝攻之其法以天清靜無陰雲風雨夜半遣輕騎往至敵人之壘九百步偏持律管橫耳大呼驚之有聲應管其來甚微角管聲應當以白虎徵管聲應當以玄武商管聲應當以勾陳五管盡不應無有商聲當以青龍此五行之府佐勝之徵陰敗之機也

故後世之言兵及周之陰權皆

宗太公為本謀周西伯政平及斷虞芮之訟而詩人稱

西伯受命曰文王伐崇密須犬夷

索隱郡國志密須在東郡廩丘縣北今曰

顧城密須姑姓在河南密縣東故密城是也與安定姬姓密國各不同

大作豐邑天下三

分其二歸周者太公之謀計居多文王崩武王即位九

年欲修文王業東伐以觀諸侯集否師行師尚父

集解  
駟案

劉向別錄曰師之尚之父之故曰師尚父亦男子之美號也

左杖黃鉞右把白旄以

誓曰蒼兕蒼兕

索隱本或作蒼雉按馬融曰蒼兕主舟楫官名又王充云蒼兕水獸九頭今誓

衆令急濟故言蒼兕以懼之

總爾衆庶與爾舟楫後至者斬遂至盟

津諸侯不期而會者八百諸侯諸侯皆曰紂可伐也武

王曰未可還師與太公作此太誓居二年紂殺王子比

干囚箕子武王將伐紂卜龜兆不吉風雨暴至羣公盡



懼唯太公彊之勸武王武王於是遂行十一年

集解徐廣曰一

作三年

正月甲子誓於牧野伐商紂紂師敗績紂反走登

鹿臺遂追斬紂明日武王立于社羣公奉明水

索隱周本紀毛

叔鄭奉明水

衛康叔封布采席

索隱周本紀衛康叔封布茲茲是席故此亦云采席也

師尚父牽牲史佚策祝以告神討紂之罪散鹿臺之錢

發鉅橋之粟以振貧民封比干墓釋箕子囚遷九鼎修

周政與天下更始師尚父謀居多於是武王已平商而

王天下封師尚父於齊營邱

正義營邱在青州臨淄北百步外城中

東就

國道宿行遲逆旅之人曰吾聞時難得而易失客寢甚

安殆非就國者也太公聞之夜衣而行犁明至國

索隱  
犁里

奚反犁猶比也  
又犁猶遲也

萊侯來伐與之爭營邱營邱邊萊萊人

夷也會紂之亂而周初定未能集遠方是以與太公爭

國太公至國修政因其俗簡其禮通商工之業便魚鹽

之利而人民多歸齊齊為大國及周成王少時管蔡作

亂淮夷

正義孔安國云淮  
浦之夷徐州之戎

畔周乃使召康公

集解服虔  
曰召公奭

命太公曰東至海西至河南至穆陵北至無棣

集解服  
虔曰是

皆太公始受封土地疆境所至也索隱舊說云穆陵在會稽非也按今淮南有故穆陵門是楚之境無棣在遼西孤竹服虔以為太公受封境界所至之域五侯九伯實得征

之

集解杜預曰五等諸侯九州之伯皆得征討其罪

齊由此得征伐為大國都

營邱盖太公之卒百有餘年

集解駰案禮記曰太公封於營邱比及五世皆反葬

於周鄭玄曰太公受封留為太師死葬於周五世之後乃葬齊皇覽曰呂尚冢在臨菑縣城南去縣十里子

丁公呂伋

集解徐廣曰一作及正義諡法述義不克曰丁

立丁公卒子乙公得

立乙公卒子癸公慈母立

索隱系本作祭公慈母譙周亦曰祭公慈心也

癸公

卒子哀公不辰立

索隱系本作不臣譙周亦作不辰宋忠曰哀公荒淫田遊史作還詩以刺

也哀公時紀侯譖之周周烹哀公

集解徐廣曰周夷王

而立其弟

靜是為胡公

正義謚法彌年壽考曰胡

胡公徙都薄姑

正義括地志云薄姑城在

青州博昌縣東北六十里

而當周夷王之時哀公之同母少弟山怨

胡公乃與其黨率營邱人襲攻殺胡公而自立是為獻

公

索隱宋忠云其黨周馬繻人將胡公於貝水殺之而山自立也

獻公元年盡逐胡公

子因徙薄姑都治臨菑九年獻公卒子武公壽立武公

九年周厲王出奔居彘

正義直厲反括地志云晉州霍邑縣也鄭玄云霍山在彘本秦

時霍伯國

十年王室亂大臣行政號曰共和二十四年周宣

王初立二十六年武公卒子厲公無忌立厲公暴虐故胡公子復入齊齊人欲立之乃與攻殺厲公胡公子亦戰死齊人乃立厲公子赤為君是為文公而誅殺厲公者七十人文公十二年卒子成公脫立

索隱系本及譙周皆作說字

成公九年卒子莊公購立

索隱劉氏音神欲反年表及系本並作贖

莊公二

十四年犬戎殺幽王周東徙維秦始列為諸侯五十六年晉弑其君昭侯六十四年莊公卒子釐公祿甫立釐公九年魯隱公初立十九年魯桓公弑其兄隱公而自

立為君二十五年北戎伐齊鄭使太子忽來救齊齊欲妻之忽曰鄭小齊大非我敵遂辭之三十二年釐公同母弟夷仲年死其子曰公孫無知釐公愛之令其秩服奉養比太子三十三年釐公卒太子諸兒立是為襄公襄公元年始為太子時嘗與無知鬪及立絀無知秩服無知怨四年魯桓公與夫人如齊齊襄公故嘗私通魯夫人魯夫人者襄公女弟也自釐公時嫁為魯桓公婦及桓公來而襄公復通焉魯桓公知之怒夫人夫人以

告齊襄公齊襄公與魯君飲醉之使力士彭生抱上魯

君車因拉殺魯桓公

集解駢案公羊傳曰擗幹而殺之何休曰擗折聲也正義拉音力合

反

桓公下車則死矣魯人以為讓

索隱讓猶責也

而齊襄公殺

彭生以謝魯八年伐紀遷去其邑

集解徐廣曰年表云去其都邑索隱

春秋莊四年紀侯大去其國左氏云違齊難也

十二年初襄公使連稱管至父

戍葵邱

集解賈逵曰連稱管至父皆齊大夫索隱杜預云臨淄西有地名葵邱又下三十五年會諸侯

於葵邱當魯僖公九年杜預曰陳留外黃縣東有葵邱不同者蓋葵邱有兩處杜意以戍葵邱當不遠出齊境故引臨淄縣西之葵邱若三十五年會諸侯於葵邱杜又以不合在本國故引外黃東葵邱為註所以不同也

瓜時而往及瓜而代

集解服虔曰瓜時七月及瓜謂後年瓜時

往戍一歲卒

瓜時而公弗為發代或為請代公弗許故此二人怒因

公孫無知謀作亂連稱有從妹在公宮無寵

集解服虔曰為妾在

宮也使之間襄公

集解王肅曰候公之間隙

曰事成以女為無知夫人

冬十二月襄公游姑楚

集解賈逵曰齊地也正義音扶云反

遂獵沛邱

集解

杜預曰樂安博昌縣南有地名貝邱正義左傳云齊襄公田於貝邱墜車傷足即此也

見彘從者

曰彭生

集解服虔曰公見彘從者乃見彭生鬼改形為豕也

公怒射之彘人立而

啼公懼墜車傷足失屨反而鞭主屨者弟

正義非佛反下同弟主屨



也者三百弗出宮而無知連稱管至父等聞公傷乃遂率

其衆襲宮逢主屢弗弗曰且無入驚宮驚宮未易入也

無知弗信弗示之創

正義音瘡

乃信之待宮外令弗先入弗

先入即匿襄公戶間良久無知等恐遂入宮弗反與宮

中及公之幸臣攻無知等不勝皆死無知入宮求公不

得或見人足於戶間發視乃襄公遂弑之而無知自立

為齊君桓公元年春齊君無知游於雍林

集解賈逵曰渠邱大夫也

索隱本亦作雍廩左傳曰雍廩殺無知杜預曰雍廩齊大夫此云游雍林雍林人嘗有怨無知遂襲殺之蓋以

雍林為邑名其地有人殺無知賈言  
渠邱大夫者蓋雍林為渠邱大夫也雍林人嘗有怨無

知及其往游雍林人襲殺無知告齊大夫曰無知弑襄

公自立臣謹行誅唯大夫更立公子之當立者唯命是

聽初襄公之醉殺魯桓公通其夫人殺誅數不當淫於

婦人數欺大臣羣弟恐禍及故次弟糾奔魯其母魯女

也管仲召忽傅之次弟小白奔莒鮑叔傅之小白母衛

女也有寵於釐公小白自少好善大夫高傒集解賈逵曰齊正卿

高敬仲也正義音奚及雍林人殺無知議立君高國先陰召小白

於莒魯聞無知死亦發兵送公子糾而使管仲別將兵  
遮莒道射中小白帶鉤小白佯死管仲使人馳報魯魯  
送糾者行益遲六日至齊則小白已入高傒立之是為  
桓公桓公之中鉤佯死以誤管仲已而載溫車中馳行  
亦有高國內應故得先入立發兵距魯秋與魯戰于乾  
時集解杜預曰乾時齊地也時水在樂安界岐流旱則涸竭故曰乾時魯兵敗走齊兵掩  
絕魯歸道齊遺魯書曰子糾兄弟弗忍誅請魯自殺之  
召忽管仲讎也請得而甘心醢之不然將圍魯魯人患

之遂殺子糾于笙瀆

集解賈逵曰魯地句瀆也索隱按鄒誕生本作莘瀆莘笙聲相近笙

如字瀆音豆論語作溝瀆蓋後代聲轉而字異故諸文不同也

召忽自殺管仲請囚桓

公之立發兵攻魯心欲殺管仲鮑叔牙曰臣幸得從君

君竟以立君之尊臣無以增君君將治齊即高傒與叔

牙足也君且欲霸王非管夷吾不可夷吾所居國國重

不可失也於是桓公從之乃詳為召管仲欲甘心實欲

用之管仲知之故請往鮑叔牙迎受管仲及堂阜而脫

桎梏

集解賈逵曰堂阜魯北境杜預曰堂阜齊地東莞蒙陰縣西北有夷吾亭或曰鮑叔解夷吾縛於此

因以為名也

齊袞而見桓公桓公厚禮以為大夫任政桓公

既得管仲與鮑叔隰朋

集解徐廣曰或作肸也

高傒修齊國政連

五家之兵

集解駟案國語曰管子制國五家為軌十軌為里四里為連十連為鄉以為軍令

設

輕重魚鹽之利

索隱管子有理人輕重之法七篇輕重錢也又有捕魚煮鹽法

以贍貧

窮祿賢能齊人皆說二年伐滅邾

集解徐廣曰一作譚索隱春秋魯莊十年

齊師滅譚是也杜預云譚國在濟南平陵縣西南然此邾乃東海邾縣蓋亦不當作邾字也

邾子奔

莒初桓公亡時過邾邾無禮故伐之五年伐魯魯將師

敗魯莊公請獻遂邑以平

集解杜預曰遂在濟北蛇邱縣東北

桓公許與

魯會柯而盟

集解杜預曰此柯今濟北東阿齊之阿邑猶祝柯今為祝阿

魯將盟曹

沫以匕首劫桓公於壇上

集解何休曰土基三尺階三等曰壇會必有壇者為升降

揖讓稱先君以相接也

曰反魯之侵地桓公許之已而曹沫去匕

首北面就臣位桓公後悔欲無與魯地而殺曹沫管仲

曰夫劫許之而倍信殺之

集解徐廣曰一云已許之而倍信殺劫也

愈一小

快耳而棄信於諸侯失天下之援不可於是遂與曹沫

三敗所亡地於魯諸侯聞之皆信齊而欲附焉七年諸

侯會桓公於甄

集解杜預曰甄衛地今東郡甄城也

而桓公於是始霸焉

十四年陳厲公子完號敬仲來奔齊

正義完音桓

齊桓公欲

以為卿讓於是以為工正

集解賈逵曰掌百工

田成子常之祖也

二十三年山戎伐燕

集解服虔曰山戎北狄蓋今鮮卑也何休曰山戎者戎中之別名也

燕告急於齊齊桓公救燕遂伐山戎至于孤竹而還燕

莊公遂送桓公入齊境桓公曰非天子諸侯相送不出

境吾不可以無禮於燕於是分溝割燕君所至與燕命

燕君復修召公之政納貢于周如成康之時諸侯聞之

皆從齊二十七年魯湣公母曰哀姜桓公女弟也哀姜

淫於魯公子慶父慶父弑湣公哀姜欲立慶父魯人更

立釐公

集解徐廣曰史記僖字皆作釐

桓公召哀姜殺之二十八年衛

文公有狄亂告急於齊齊率諸侯城楚邱而立衛君

集解

賈逵曰衛地也索隱杜預曰不言城衛衛未遷楚邱城武縣南即今之衛南縣是也

二十九年桓

公與夫人蔡姬戲船中蔡姬習水蕩公

集解賈逵曰蕩搖也

公懼

止之不止出船怒歸蔡姬弗絕蔡亦怒嫁其女桓公聞

而怒興師往伐三十年春齊桓公率諸侯伐蔡蔡潰

集解

服虔曰民逃其上曰潰也

遂伐楚楚成王興師問曰何故涉吾地管



仲對曰昔召康公命我先君太公曰五侯九伯若實征

之以夾輔周室

集解駢案左傳曰周公太公股肱周室夾輔成王也

賜我先君履

集解杜預曰所踐履之界

東至海西至河南至穆陵北至無棣楚貢

包茅不入王祭不共

集解賈逵曰包茅菁茅匭之也以供祭祀杜預曰尚書包匭菁茅茅

之為異未審

是以來責昭王南征不復是以來問

集解服虔曰周昭王

南巡狩涉漢未濟船解而溺昭王王室諱之不以赴諸侯不知其故故桓公以為辭責問楚也索隱宋忠云昭王南伐楚卒田靡為右涉漢中流而隕由靡逐王遂卒不復周乃侯其後于西翟

楚王曰貢之

不入有之寡人罪也敢不共乎昭王之出不復君其問

之水濱

集解杜預曰昭王時漢非楚境故不受罪

齊師進次于陘

集解杜預曰陘楚地

潁川召陵縣南有陘亭左傳曰凡師一宿為舍再宿為信過信為次

夏楚王使屈完將兵

扞齊齊師退次召陵

集解杜預曰召陵潁川縣

桓公矜屈完以其衆

屈完曰君以道則可若不則楚方城以為城

集解服虔曰方城山

在漢南韋昭曰方城楚北之阨塞杜預曰方城山在南陽葉縣南是也索隱地理志葉縣南有長城號曰方城則杜預韋昭說為得而服氏云在漢南未知有何依據

江漢以為溝君安能進乎

乃與屈完盟而去過陳陳袁濤塗詐齊令出東方覺秋

齊伐陳

集解駰案左傳曰討不忠也

是歲晉殺太子申生三十五年

夏會諸侯于葵邱

集解杜預曰陳留外黃縣東有葵邱也

周襄王使宰孔

賜桓公文武胙彤弓矢大路

集解賈逵曰大路諸侯朝服之車謂之金路

命

無拜桓公欲許之管仲曰不可乃下拜受賜

集解韋昭曰下堂拜

也賜秋復會諸侯於葵邱益有驕色周使宰孔會諸侯頗

有叛者

集解駟案公羊傳曰葵邱之會桓公震而矜之叛者九國

晉侯病後遇宰孔

宰孔曰齊侯驕矣第無行從之是歲晉獻公卒里克殺

奚齊淖子

集解徐廣曰史記卓多作淖正義卓尹角反

秦穆公以夫人入公

子夷吾為晉君桓公於是討晉亂至高梁

集解服虔曰晉地也杜預

曰在平陽縣西南使隰朋立晉君還是時周室微唯齊楚秦晉

為彊晉初與會

正義與音預下同

獻公死國內亂秦穆公辟遠

不與中國會盟楚成王初收荆蠻有之夷狄自置唯獨齊為中國會盟而桓公能宣其德故諸侯賓會於是桓公稱曰寡人南伐至召陵望熊山北伐山戎離枝孤竹

集解駟案地理志云令支縣有孤竹城疑離枝即令支也令離聲相近應劭曰令音鈴鈴離聲亦相近管子亦作離字索隱離枝音零支又音令祇又如字離枝孤竹皆古國名秦以離支為縣故地理志云遼西令支縣有孤竹城爾雅曰孤竹北戶西王母日下謂之四荒也西伐大夏涉流沙

正義大夏并州晉陽

是東馬懸車登太行至卑耳山

正義卑音壁劉伯莊及韋昭並如字

而還

諸侯莫違寡人寡人兵車之會三

正義左傳云魯莊十三年會北杏以平宋

亂僖四年侵蔡遂伐楚六年伐鄭圍新城也

乘車之會六

正義左傳云魯莊十四年會于鄆十

五年又會鄆十六年同盟于幽僖五年會首止八年盟于洮九年會葵邱是也

九合諸侯一匡

天下

正義匡正也一匡天下謂定襄王為太子之位

昔三代受命有何以異於

此乎吾欲封泰山禪梁父管仲固諫不聽乃說桓公以

遠方珍怪物至乃得封桓公乃止三十八年周襄王弟

帶與戎翟合謀伐周齊使管仲平戎於周周欲以上卿

禮管仲管仲頓首曰臣陪臣安敢三讓乃受下卿禮以見三十九年周襄王弟帶來奔齊齊使仲孫請王為帶謝襄王怒弗聽四十一年秦穆公虜晉惠公復歸之是

歲管仲隰朋皆卒

正義括地志云管仲冢在青州臨淄縣南二十一里牛山上與桓公冢連

隰朋墓在青州臨淄縣東北七里也

管仲病桓公問曰羣臣誰可相者管

仲曰知臣莫如君公曰易牙如何

正義即雍巫也賈逵云雍巫雍人名巫易

牙對曰殺子以適君非人情不可公曰開方如何

正義管子

云衛公子開方去其干乘之太子而臣事君也

對曰倍親以適君非人情難近

公曰豎刁如何

正義刁爲條反顏師古云豎刁易牙皆齊桓公臣管仲有病桓公往問之曰將

何以教寡人管仲曰願君遠易牙豎刁公曰易牙烹其子以快寡人尚可疑耶對曰人之情非不愛其子也其子之忍又將何愛於君公曰豎刁自宮以近寡人猶尚疑耶對曰人之情非不愛其身也其身之忍又將何有於君公曰諾管仲遂盡逐之而公食不甘心不怡者三年公曰仲父不已過乎於是皆即召反明年公有病易牙豎刁相與作亂塞宮門築高牆不通人有一婦人踰垣入至公所公曰我欲食婦人曰吾無所得又曰我欲飲婦人曰吾無所得公曰何故曰易牙豎刁相與作亂塞宮門築高牆不通人故無所得公慨然歎涕出曰嗟乎聖人所見豈不遠哉若死者有知我將何面目見仲父乎蒙衣袂而死乎壽宮蟲流於戶蓋以楊門之扇二

月不 殯也對曰自宮以適君非人情難親管仲死而桓公不

用管仲言卒近用三子三子專權四十二年戎伐周周

告急於齊齊令諸侯各發卒戍周是歲晉公子重耳來

桓公妻之四十三年初齊桓公之夫人三曰王姬徐姬

蔡姬皆無子

索隱系本徐嬴姓禮婦人稱國及姓今此言徐姬者然姬是衆妾之總稱故漢祿秩

令云姬妾數百婦人亦總稱姬未必盡是姓

桓公好內

集解服虔曰內婦官也

多內寵

如夫人者六人長衛姬生無詭

索隱左氏作無虧

少衛姬生惠

公元鄭姬生孝公昭葛嬴生昭公潘密姬生懿公商人

宋華子

集解賈逵曰宋華氏之女子姓

生公子雍桓公與管仲屬孝公



於宋襄公以為太子雍巫有寵於衛共姬

集解賈逵曰雍巫雍人名

巫易牙字索隱賈逵以雍巫為易牙字未知何據按管子有棠巫恐與雍巫是一人也

因宦者豎

刁以厚獻於桓公亦有寵桓公許之立無詭

集解杜預曰易牙既

有寵於公為長衛姬請立

管仲卒五公子皆求立冬十月乙亥齊桓

公卒易牙入與豎刁因內寵殺羣吏

集解服虔曰內寵如夫人者六人羣

吏諸大夫也杜預曰內寵內官之有權寵者

而立公子無詭為君太子昭奔

宋桓公病五公子各樹黨爭立及桓公卒遂相攻以故

宮中空莫敢棺

正義音古患反

桓公尸在牀上六十七日尸蟲

出子戶十二月乙亥無詭立乃棺赴辛巳夜斂殯

集解徐廣

曰斂一作臨也

桓公十有餘子要其後立者五人無詭立三月

死無謚次孝公次昭公次懿公次惠公孝公元年三月

宋襄公率諸侯兵送齊太子昭而伐齊齊人恐殺其君

無詭齊人將立太子昭四公子之徒攻太子太子走宋

宋遂與齊人四公子戰五月宋敗齊四公子師而立太

子昭是為齊孝公宋以桓公與管仲屬之太子故來征

之以亂故八月乃葬齊桓公

集解皇覽曰桓公冢在臨菑城南七里所菑水南正

義括地志云齊桓公墓在臨菑縣南二十一里牛山上亦名鼎足山一名牛首岡一所二墳晉永嘉末人發之初得版次得水銀池有氣不得入經數日乃牽犬入中得金蠶數十薄珠襦玉匣繒綵軍器不可勝數又以人殉葬骸骨狼籍也

六年春齊伐宋以其不同盟于齊也

集解服虔曰魯

僖公十九年諸侯盟于齊以無忘桓公之德宋襄公欲行霸道不與盟故伐之

夏宋襄公卒七

年晉文公立十年孝公卒孝公弟潘因衛公子開方殺

孝公子而立潘是為昭公昭公桓公子也其母曰葛嬴

昭公元年晉文公敗楚於城濮

正義賈逵云衛地也

而會諸侯踐

土朝周天子使晉稱伯

正義音霸

六年翟侵齊晉文公卒秦

兵敗於穀十二年秦穆公卒十九年五月昭公卒子舍  
立為齊君舍之母無寵於昭公國人莫畏昭公之弟商  
人以桓公死爭立而不得陰交賢士附愛百姓百姓說  
及昭公卒子舍立孤弱即與衆十月即墓上弑齊君舍  
而商人自立是為懿公懿公桓公子也其母曰密姬懿  
公四年春初懿公為公子時與丙戎之父獵爭獲不勝  
及即位斷丙戎父足而使丙戎僕

集解賈逵曰僕御也  
索隱左氏作郤歌僕

正義左傳云乃掘而刑  
之杜預云斷其尸足也庸職之妻好公內之宮使庸職

驂乘

索隱左氏作閭職此言庸職不同者傳所云閭姓職名也此言庸職庸非姓蓋謂受雇職之妻史意

不同字亦異耳

五月懿公游於申池

集解杜預曰齊南城門名申門齊城無池惟此門左

右有池疑此是也左思齊都賦註曰申池海濱齊藪也

二人浴戲職曰斷足子戎

曰奪妻者二人俱病此言乃怨謀與公游竹中二人弑

懿公車上棄竹中而亡去懿公之立驕民不附齊人廢

其子而迎公子元於衛立之是為惠公惠公桓公子也

其母衛女曰少衛姬避齊亂故在衛惠公二年長翟來

集解駟按穀梁傳曰身橫九畝斷其首而載之眉見於軾

王子城父攻殺之

集解賈逵曰王

子城父齊大夫

埋之於北門晉趙穿弑其君靈公十年惠公卒

子頃公無野立

正義頃音傾

初崔杼有寵於惠公惠公卒高

國畏其偪也逐之崔杼奔衛頃公元年楚莊王彊伐陳

二年圍鄭鄭伯降已復國鄭伯六年春晉使卻克於齊

齊使夫人帷中而觀之卻克上夫人笑之卻克曰不是

報不復涉河歸請伐齊晉侯弗許齊使至晉卻克執齊

使者四人河內殺之八年晉伐齊齊以公子彊質晉晉

兵去十年春齊伐魯衛魯衛大夫如晉請師皆因卻克

索隱成二年左傳魯臧宣叔衛孫桓子如晉皆主於郤克是

晉使郤克以車八百乘

集解賈逵曰八百乘六萬人

為中軍將士燮將上軍欒書將下軍以

救魯衛伐齊六月壬申與齊侯兵合靡笄下

集解徐廣曰靡一作

摩賈逵曰靡笄山名也索隱靡如字靡笄山名在濟南與代地磨笄不同

癸酉陳于鞌

集解服虔

曰鞌齊地名也

逢丑父

集解賈逵曰齊大夫

為齊頃公右頃公曰馳之破

晉軍會食射傷郤克流血至履克欲還入壁其御曰我

始入再傷不敢言疾恐懼士卒願子忍之遂復戰戰齊

急丑父恐齊侯得乃易處頃公為右車絰於木而止

正義

結胡卦反止

晉小將韓厥伏齊侯車前曰寡君使臣救

魯衛戲之丑父使頃公下取飲

正義左傳云及華泉驂結於木而止丑父使公

下如華泉取飲鄭周父御佐車宛茂為右載齊侯以免

因得亡脫去入其軍晉卻

克欲殺丑父丑父曰代君死而見僇後人臣無忠其君

者矣克舍之丑父遂得亡歸齊於是晉軍追齊至馬陵

集解徐廣曰一作陘駟案賈逵曰馬陘齊地也

齊侯請以寶器謝

集解駟案左傳曰賂以紀

甌玉不聽必得笑克者蕭桐叔子

集解杜預曰桐叔蕭君之字齊侯外祖父

子女也難斥言其母故遠言之賈逵曰蕭附庸子姓

令齊東畝

集解服虔曰欲令齊隴畝東行索隱



壘敵東行則晉車馬東向齊行易也對曰叔子齊君母齊君母亦猶晉君

母子安置之且子以義伐而以暴為後其可乎於是乃

許令反魯衛之侵地

正義左傳云晉師及齊國佐盟使齊人歸我汶陽之田也

十一年

晉初置六卿賞宰之功齊頃公朝晉欲尊王晉景公

隱索

王劭按張衡曰禮諸侯朝天子執玉既授而反之若諸侯自相朝則不授玉齊頃公戰敗朝晉而授玉是欲尊晉侯為王太史公採其言而書之此文不云授玉王氏之說復有所依聊記異耳

晉景公不敢

受乃歸歸而頃公弛苑囿薄賦斂振孤問疾虛積聚以救民民亦大說厚禮諸侯竟頃公卒百姓附諸侯不犯

十七年頃公卒

集解駟案皇覽曰頃公冢近呂尚冢

子靈公環立靈公九

年晉欒書弑其君厲公十年晉悼公伐齊齊令公子光

質晉十九年立子光為太子高厚傅之令會諸侯盟於

鍾離

正義括地志云鍾離故城在沂州承縣界

二十七年晉使中行獻子伐

齊

索隱荀偃祖林父代為中行後改姓為中行氏獻子名偃

齊師敗靈公走入臨菑

晏嬰止靈公靈公弗從曰君亦無勇矣晉兵遂圍臨菑

臨菑城守不敢出晉焚郭中而去二十八年初靈公取

魯女生子光以為太子仲姬戎姬戎姬嬖仲姬生子牙

屬之戎姬戎姬請以為太子公許之仲姬曰不可光之

立列於諸侯矣

集解服虔曰數從諸侯征伐盟會

今無故廢之君必悔

之公曰在我耳遂東太子光

集解賈逵曰徙之東垂

使高厚傅牙

為太子靈公疾崔杼迎故太子光而立之是為莊公莊

公殺戎姬五月壬辰靈公卒莊公即位執太子牙於句

實之邱殺之八月崔杼殺高厚晉聞齊亂伐齊至高唐

集解杜預曰高唐在祝阿縣西北

莊公三年晉大夫欒盈

集解徐廣曰史記多作逞

奔齊莊公厚客待之晏嬰田文子諫公弗聽四年齊莊

公使欒盈間入晉曲沃

集解賈逵曰欒盈之邑

為內應以兵隨之

上太行入孟門

集解賈逵曰孟門太行皆晉山隘也索隱孟門山在朝歌東北太行山在河內

溫縣西

欒盈敗齊兵還取朝歌

集解賈逵曰晉邑

六年初棠公妻

好

集解賈逵曰棠公齊棠邑大夫

棠公死崔杼取之莊公通之數如崔

氏以崔杼之冠賜人侍者曰不可崔杼怒因其伐晉欲

與晉合謀襲齊而不得間莊公嘗筮宦者賈舉賈舉復

侍為崔杼間公

集解服虔曰伺公間隙正義間音閑又如字

以報怨五月莒

子朝齊齊以甲戌饗之崔杼稱病不視事乙亥公問崔

杼病遂從崔杼妻崔杼妻入室與崔杼自閉戶不出公

擁柱而歌

集解服虔曰公以為姜氏不知己在外故歌以命之也一曰公自知見欺恐不得出故歌

以自

悔 宦者賈舉遮公從官而入閉門崔杼之徒持兵從

中起公登臺而請解不許請盟不許請自殺於廟不許

皆曰君之臣杼疾病不能聽命

集解服虔曰言不能親聽公命

近於公

宮

集解服虔曰崔杼之宮近公宮淫者或詐稱公

陪臣爭趣

集解徐廣曰爭一作扞索隱左傳作

扞 趣此為爭趣者是太史公變左傳之文言陪臣但爭趣投有淫者耳更不知他命也

有淫者不

知二命

集解杜預曰言得淫人受崔子命討之不知他命也

公踰牆射中公股公

反墜遂弑之晏嬰立崔杼門外

集解賈逵曰聞難而來

曰君為社

稷死則死之為社稷亡則亡之

集解服虔曰謂以公義為社稷死亡也如是者

臣亦隨之死亡

若為已死已亡非其私暱誰敢任之

集解服虔曰言君自

以己之私欲取死亡之禍則私近之臣所當任也集門解杜預曰私暱所親愛也非所親愛無為當其禍也

開而入枕公尸而哭三踊而出人謂崔杼必殺之崔杼

曰民之望也舍之得民

集解服虔曰置之所以得人心

丁丑崔杼立莊

公異母弟杵臼

集解徐廣曰史記多作著臼

是為景公景公母魯叔

孫宣伯女也景公立以崔杼為右相慶封為左相二相

恐亂起乃與國人盟曰不與崔慶者死晏子仰天曰嬰  
所不獲唯忠於君利社稷者是從不肯盟慶封欲殺晏  
子崔杼曰忠臣也舍之齊太史書曰崔杼弑莊公崔杼  
殺之其弟復書崔杼復殺之少弟復書崔杼乃舍之景  
公元年初崔杼生子成及彊其母死取東郭女生明東  
郭女使其前夫子無咎與其弟偃正義杜預云東郭  
偃東郭姜之弟也相  
崔氏成有罪正義左傳云成有疾而  
廢之杜預云有惡疾也二相急治之立明  
為太子成請老於崔杼崔杼許之二相弗聽曰崔宗邑

不可

集解杜預曰濟南東朝陽縣西北有崔氏城也

成彊怒告慶封

正義左傳成彊告慶

封曰夫子身亦子所知也唯無咎與偃是從父兄莫得進矣恐害夫子敢以告慶封曰苟利夫子必去之難吾助汝乃殺東郭偃常無咎於崔氏朝也其妻及崔杼皆縊死崔明奔魯

慶封與崔杼有郤

欲其敗也成彊殺無咎偃於崔杼家家皆奔亡崔杼怒

無人使一宦者御見慶封慶封曰請為子誅之使崔杼

仇盧蒲嫫

集解賈逵曰嫫齊大夫慶封之屬

攻崔氏殺成彊盡滅崔氏

崔氏婦自殺崔杼無歸亦自殺慶封為相國專權三年

十月慶封出獵初慶封已殺崔杼益驕嗜酒好獵不聽



政令慶舍用政

集解服虔曰舍慶封之子也生傳其職政與子

已有內郤田文

子謂桓子曰亂將作田鮑高樂氏相與謀慶氏慶舍發甲圍慶封宮四家徒共擊破之慶封還不得入奔魯齊人讓魯封奔吳吳與之朱方聚其族而居之富於在齊其秋齊人徙葬莊公僂崔杼尸於市以說衆九年景公使晏嬰之晉與叔向私語曰齊政卒歸田氏田氏雖無大德以公權私有德於民民愛之十二年景公如晉見平公欲與伐燕十八年公復如晉見昭公二十六年獵

魯郊因入魯與晏嬰俱問魯禮三十一年魯昭公辟季

氏難奔齊齊欲以千社封之

集解賈逵曰二十五家為一社千社二萬五千家也

子家止昭公昭公乃請齊伐魯取鄆

正義鄆鄆城也

以居昭公

三十二年彗星見景公坐栢寢嘆曰堂堂誰有此乎

集解

服虔曰景公自恐德薄不能久享齊國故曰誰有此也

羣臣皆泣晏子笑公怒晏

子曰臣笑羣臣諛甚景公曰彗星出東北當齊分野寡人以為憂晏子曰君高臺深池賦歛如弗得刑罰恐弗

勝弗星將出彗星

正義弗音佩謂客星侵近邊側欲相害又曰彗息歲反若帚形見其境有

亂也

何懼乎公曰可禳否晏子曰使神可祝而來

正義祝音章受

反

亦可禳而去也百姓苦怨以萬數而君令一人禳之

安能勝衆口乎是時景公好治宮室聚狗馬奢侈厚賦  
重刑故晏子以此諫之四十二年吳王闔閭伐楚入郢  
四十七年魯陽虎攻其君不勝奔齊齊伐魯鮑子諫  
景公乃囚陽虎陽虎得亡奔晉四十八年與魯定公好  
會夾谷

集解服虔曰東海祝其縣是也

犁鉏曰孔丘知禮而怯請令萊

人為樂

集解杜預曰萊人齊所滅萊夷索隱鉏音即餘反即犁彌也

因執魯君可得

志景公害孔丘相魯懼其霸故從犁鉏之計方會進萊  
樂孔子歷階上使有司執萊人斬之以禮讓景公景公  
慙乃歸魯侵地以謝而罷去是歲晏嬰卒五十五年范  
中行反其君於晉晉攻之急來請粟田乞欲為亂樹黨  
於逆臣說景公曰范中行數有德於齊不可不救乃使  
乞救而輸之粟五十八年夏景公夫人燕姬適子死景  
公寵妾芮姬生子荼索隱左傳云鬻姒之子荼娶則荼母姓姒此作芮姬不同也譙周依  
左氏作鬻姒鄒誕生本荼少其母賤無行諸大夫恐其  
作芮姁姁音五句反

為嗣乃言願擇諸子長賢者為太子景公老惡言嗣事

又愛荼母欲立之憚發之口乃謂諸大夫曰為樂耳國

何患無君乎秋景公病命國惠子高昭子

集解杜預曰惠子國夏也

昭子高張也

立少子荼為太子逐羣公子遷之萊

集解服虔曰萊齊東

鄒邑景公卒

集解駰案皇覽曰景公冢與桓公冢同處

太子荼立是為晏孺子

冬未葬而羣公子畏誅皆出亡荼諸異母兄公子壽駒

黔奔衛

集解徐廣曰一云壽黔奔衛索隱壽一作嘉三人奔衛正義三公子

公子駟陽生

奔魯

索隱左氏作公子鉏二人奔魯

萊人歌之曰景公死乎弗與埋三

軍事乎弗與謀

集解服虔曰萊人見五公子遠邇鄆邑不得與景公葬埋之事及國三軍之謀

故慙而歌杜預曰稱謚蓋葬後而為此歌哀羣公子失所也

師乎師乎胡黨之乎

集解

服虔曰師衆也黨所也言公子徒衆何所適也

晏孺子元年春田乞偽事高國

者每朝乞驂乘言曰子得君大夫皆自危欲謀作亂又

謂諸大夫曰高昭子可畏及未發先之大夫從之六月

田乞鮑牧乃與大夫以兵入公宮攻高昭子昭子聞之

與國惠子救公公師敗田乞之徒追之國惠子奔莒遂

反殺高昭子晏圉奔魯

集解賈逵曰晏嬰之子

八月齊秉意茲

集解

徐廣曰左傳八月齊邴意茲奔魯

田乞敗二相乃使人之魯召公子陽

生陽生至齊私匿田乞家十月戊子田乞請諸大夫曰

常之母有魚菽之祭

集解何休曰齊俗婦人首祭事言魚豆者示薄陋無所有也

幸

來會飲會飲田乞盛陽生橐中置坐中央發橐出陽生

曰此乃齊君矣大夫皆伏謁將與大夫盟而立之鮑牧

醉乞誣大夫曰吾與鮑牧謀共立陽生鮑牧怒曰子忘

景公之命乎諸大夫相視欲悔陽生前頓首曰可則立

之否則已鮑牧恐禍起乃復曰皆景公子也何為不可

乃與盟立陽生是為悼公悼公入宮使人遷晏孺子於

駘

集解賈逵曰齊邑

殺之幕下而逐孺子母芮子芮子故賤而

孺子少故無權國人輕之悼公元年齊伐魯取謹闡

集解

杜預曰闡在東平剛縣北索隱二邑名謹在博城縣

初陽生亡在魯季康子以其

妹妻之及歸即位使迎之季姬與季魴侯通

集解杜預曰魴侯康

子叔父也

言其情魯弗敢與故齊伐魯竟迎季姬季姬嬖齊

復歸魯侵地鮑子與悼公有郤不善四年吳魯伐齊南

方鮑子弑悼公赴于吳吳王夫差哭於軍門外三日將



從海入討齊齊人敗之吳師乃去晉趙鞅伐齊至賴而

去

集解服虔曰賴齊邑

齊人共立悼公子壬是為簡公

集解徐廣曰年表云

簡公壬者景公之子也

簡公四年春初簡公與父陽生俱在魯也

闕止有寵焉

集解賈逵曰闕止子我也索隱左氏監作闕音苦濫反闕在東平須昌縣東南

及

即位使為政田成子憚之驟顧於朝

集解杜預曰心不安故數顧也

御

鞅言簡公

集解賈逵曰鞅齊大夫也索隱鞅名為僕御之官故曰御鞅亦田氏之族按系本陳桓子

元字產子壺壺產子獻獻產鞅也

曰田闕不可並也君其擇焉

集解杜預曰擇

用一弗聽子我夕

集解服虔曰夕省事

田逆殺人逢之

集解服虔曰子我將

往夕省事於君而逢逆之殺集解杜預曰執人也杜預曰逆子行陳氏宗遂捕以入集解杜預曰執逆入至於朝也

田氏方睦

集解服虔曰陳常方欲謀有齊國故和其宗族

使因病而遺守囚者

酒

集解服虔曰使陳逆詐病而遺也

醉而殺守者得亡子我盟諸田於

陳宗

集解服虔曰子我見陳逆得生出而恐為陳氏所怨故與盟而請和也陳宗宗長之家

初田

豹欲為子我臣

集解賈逵曰豹陳氏族也

使公孫言豹

集解賈逵曰公孫齊大夫

也杜預曰言介達之意

豹有喪而止後卒以為臣

集解杜預曰終喪也

幸於

子我子我謂曰吾盡逐田氏而立女可乎對曰我遠田

氏矣

集解服虔曰言我與陳氏宗疎遠也

且其違者不過數人

集解服虔曰違者不

從子我者何盡逐焉遂告田氏子行曰彼得君弗先必禍子

集解服虔曰彼謂闕止也子謂陳常也

子行舍於公宮

集解服虔曰止於公宮為陳氏作內

也夏五月壬申成子兄弟四乘如公

集解服虔曰成子兄弟八人二人共

一乘故曰四乘索隱系本陳僖子乞產成子常簡子齒宣子其夷穆子安廩丘子尚璽茲子芒盈惠子得凡七人杜預又取昭子莊以充八人之數按系本昭子是桓子之子成子之叔父又不名莊彊相證會言四乘有八人耳今按田完系家云田常兄弟四人如公宮與此事同今此唯稱四乘不云人數知四乘謂弟兄四人乘車而入非二人共乘也然其昆弟三人不見者蓋時或不在不同入公宮不可彊以四乘為八人添叔父為兄弟之數服虔杜預之失也

子我在幄

集解杜預曰幄帳也聽政之處也

出迎之遂入

閉門

集解服虔曰成子兄弟見子我出遂突入反閉門子我不得復入

宦者禦之

集解服虔

曰閭豎以兵禦陳氏

子行殺宦者

集解服虔曰舍於公宮故得殺之

公與婦人飲

酒于檀臺

集解服虔曰當陳氏入時飲酒於此臺

成子遷諸寢

集解服虔曰欲徙公

令居寢也公執戈將擊之

集解杜預曰疑其作亂也

大史子餘

集解服虔曰齊大夫

曰非不利也將除害也

集解杜預曰言將為公除害也

成子出舍于庫

集解杜預曰以公怒故也

聞公猶怒將出

集解服虔曰出奔也

曰何所無君子

行拔劍曰需事之賊也

集解杜預曰言需疑則害事

誰非田宗

集解杜預

曰言陳氏宗族衆多

所不殺子者有如田宗

集解杜預曰言子若欲出我必殺子明如

陳乃止子我歸屬徒

集解服虔曰會徒衆

攻闐與大門

集解服虔曰宮中之

門曰闐大門公門也

皆弗勝乃出田氏追之豐丘人執子我以告

集解賈逵曰豐丘陳氏邑也

殺之郭闐

集解服虔曰齊闐名

成子將殺大陸子

方

集解服虔曰子方子我之黨大夫東郭賈也

田逆請而免之以公命取車

於道

集解杜預曰子方取道中行人車

出雍門

集解杜預曰齊城門

田豹與之車

弗受曰逆為余請豹與余車余有私焉事子我而有私

於其讎何以見魯衛之士

集解服虔曰子方將欲奔魯衛也左傳曰東郭賈奔衛

庚辰田常執簡公于徐州

集解春秋作舒州賈逵曰陳氏邑也索隱徐音舒其字從

人左氏作舒舒陳氏邑說文作郅郅在薛縣也

公曰余蚤從御鞅言不及此甲

午田常弑簡公于徐州田常乃立簡公弟騫是為平公

索隱系本及譙周皆作敬誤也

平公即位田常相之專齊之政割齊安

平以東為田氏封邑

集解徐廣曰年表云平公之時齊自是稱田氏索隱曰安平齊邑地

理志云涿郡有安平縣

平公八年越滅吳二十五年卒子宣公積

立宣公五十一年卒子康公貸立田會反廩丘

索隱田會齊大

夫廩邑名東郡有廩丘縣也

康公二年韓魏趙始列為諸侯十九年

田常曾孫田和始為諸侯遷康公海濱二十六年康公

卒呂氏遂絕其祀田氏卒有齊國為齊威王彊於天下  
太史公曰吾適齊自泰山屬之琅邪北被于海膏壤二  
千里其民闊達多匿知其天性也太公之聖建國本  
桓公之盛修善政以為諸侯會盟稱伯不亦宜乎洋洋  
哉固大國之風也

索隱述贊曰太公佐周實秉陰謀既表東海乃居營  
丘小白致霸九合諸侯及溺內寵疊鍾蟲流莊公失  
德崔杼作仇陳氏傳政厚貨輕收悼簡  
邁禍田闚非倚風風餘烈一變何由

史記卷三十二



史記卷三十二考證

齊太公世家虞夏之際封于呂集解徐廣曰呂在南陽

宛縣西○

臣召南

按路史國名紀曰呂侯爵伯夷之

封杜預謂在南陽宛西南陽今隸鄧宛後周併入南陽而太公乃出東呂呂莒也博物志曲海城有東呂鄉東呂里太公望所出也與徐廣說異

以漁釣奸周西伯正義凡谷○凡一本作几又正義此條訛脫殊甚今俱考原文改正

獻公元年盡逐胡公子因徙薄姑都治臨菑○臣照按

毛詩疏曰古者諸侯之居逼隘則王者遷其邑而定其居時齊居逼隘故王使仲山甫往城而定之也既言所定不知定在何處故毛傳云蓋去薄姑而遷於臨菑也毛時書籍猶多去聖未遠雖言蓋為疑辭其當有所依約而言也史記云獻公徙薄姑都治臨菑計獻公當夷王之時與此傳不合毛公在馬遷之前其言當有準據

反而鞭主屨者第三百○

臣照

按左傳作誅屨於徒人

費誅責也言責失屨之罪于徒人費也此以為主屨

與傳異

曹沫以匕首劫桓公于壇上○習學記言曰遷言曹沫

以匕首劫齊桓公遂與沫三敗所亡地此事公羊先

見按左氏魯莊公九年納糾敗于乾時幾獲十年有

長勺之勝劇實主之齊猶未已與宋次乘丘公子偃

敗宋師齊乃還十三年北杏之會齊將稱霸其冬魯

乃會盟于柯是三戰而再勝未嘗失地三年不交兵  
何用要劫二十三年曹劌復諫觀社詳其前後詞語  
豈操匕首于壇坫之間者耶

諸侯會桓公於甄○年表作鄆

臣世駿

按經典釋文甄

音絹一音真或音旃又舉然反或作鄆

蔡潰集解民逃其上○上監本訛作土今改正

六年翟侵齊晉文公卒○左傳晉文公卒于齊昭公之  
五年在翟伐齊之前此作六年

十九年五月昭公卒○年表作二十年

即與衆十月即墓上弑齊君舍○按春秋經作九月左  
傳云以七月乙卯夜杜注云書九月從告此云十月  
疑十為七字之誤

懿公桓公子也其母曰密姬○董份曰按上既曰某姬  
生某公矣則此復曰其母曰某姬恐衍

懿公游于申池集解曰杜預曰齊南城門名申門齊城  
無池惟此門左右有池疑此是也左思齊都賦注曰

申池海濱齊藪也○臣照按襄十八年左傳晉侯伐齊己亥焚雍門及西郭南郭劉難士弱率諸侯之師焚申池之竹木申池與西郭南郭近則杜預所謂申門之池者是矣杜預原注稱齊南城西門名申門裴駢刪去西字耳

六年春晉使卻克於齊○左傳及年表卻克使齊在頃公七年為魯宣之十七年

卻克執齊使者四人河內殺之○左傳齊侯使高固晏

弱蔡朝南郭偃會及斂孟高固逃歸晉人執晏弱于  
野王執蔡朝于原執南郭偃于溫苗賁皇言于晉侯  
晉人緩之逸此云殺之與傳異

十年春齊伐魯衛○臣照按左傳成公二年春齊侯伐  
我北鄙衛侯使孫良夫石稷甯相向禽將侵齊是齊  
伐魯非伐衛也

皆因卻克索隱衛孫桓子○桓監本訛作相今改正  
仲姬戎姬○此句上應有脫字

崔杼迎故太子光而立之是為莊公○徐孚遠曰前言崔杼奔衛不言其歸國又杼非命卿何以得專冊立皆闕文

八月崔杼殺高厚晉聞齊亂伐齊至高唐○臣照按左傳莊公即位執公子牙于句瀆之丘以夙沙衛異己衛奔高唐以叛晉士匄侵齊及穀聞喪而還此皆在崔杼殺高厚前為五月事馬遷并二事為一又有晉伐至高唐之文皆與傳異



成請老于崔杼○

臣照

按左傳成請老於崔杜預注濟

南東朝陽縣西北有崔氏城成欲居崔邑以終老此  
作崔杼明衍杼字

悼公元年齊伐魯取謹闡○左傳及十二諸侯年表齊  
取謹闡在悼公二年

吳師乃去晉○監本誤作吳帥齊去晉今改正

齊人共立悼公子壬是為簡公集解徐廣曰年表云簡  
公壬者景公之子也○年表云鮑子殺悼公齊人立

其子壬為簡公無景公之子語

子宣公積立○積年表作就匝

史記卷三十二考證